

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵ
ՀԱՐԿԱՅԻՆ ԵՎ ՄԱՔՍԱՅԻՆ ՄԱՐՄԻՆՆԵՐԻ ԲՈՂՈՔԱՐԿՄԱՆ
ՀԱՆՁՆԱԺՈՂՈՎ**

ՈՐՈՇՈՒՄ N 30/7

ք.Երևան

15 հուլիսի 2022թ.

Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը (այսուհետ նաև՝ Հանձնաժողով), քննության առնելով շրջանառության հարկ վճարող համարվելու վերաբերյալ Ա/Ձ Այլոնա Գրոմովայի (ՀՎՀՀ՝ 72926468) դիմում-բողոքը՝

ՊԱՐԶԵՑ

1. Բողոքարկման առարկան, դիմում-բողոքով բերված փաստարկները և ներկայացված պահանջները

Ա/Ձ Այլոնա Գրոմովան հայտնում է, որ գործունեություն է ծավալում ՏՏ ոլորտում և ՀՀ հարկային օրենսգրքի 254 հոդվածի համաձայն բավարարում է շրջանառության հարկ վճարող համարվելու պահանջներին: Սույն թվականի մարտի 9-ին ժամանել է Հայաստան, մարտի 11-ին հաշվառվել է ՀՀ ԱՆ իրավաբանական անձանց պետական ռեգիստրում որպես անհատ ձեռնարկատեր, սակայն սկզբնական փուլում հասկացել է, որ չի կարողանալու գործունեություն ծավալել մինչև լիարժեք չհաստատվի ՀՀ-ում և ս/թ մարտի 30-ին հաշվառումից դուրս է եկել որպես անհատ ձեռնարկատեր: Կախված աշխարհաքաղաքական իրավիճակից՝ վերջնականապես տեղափոխվել է ՀՀ և ցանկանում է ապրել և աշխատել ՀՀ-ում: Սկզբնական ժամանակաշրջանում զբաղվել է տեղափոխման և ՀՀ-ում հաստատման հարցերով, որից հետո ս/թ մայիսի 30-ին վերահաշվառվել են կրկին որպես անհատ ձեռնարկատեր, անտեղյակ են եղել որպես անհատ ձեռնարկատեր հաշվառվելուց հետո պետք է 20 օրվա ընթացքում շրջանառության հարկ վճարող համարվելու վերաբերյալ հայտարարություն ներկայացնեն: Ցանկանալով օգտվել ՀՕ-ով սահմանված արտոնություններից և քանի որ հայտարարության ներկայացման վերջնաժամկետը կրկին վերահաշվառվելուց հետո ժամկետի մեջ է՝ խնդրում է բացառության կարգով տալ հնարավորություն շրջանառության հարկ վճարող համարվելու վերաբերյալ հայտարարություն ներկայացնել:

2. Դիմում-բողոքի քննության համար էական նշանակություն ունեցող փաստերը

Ա/Ձ Այլոնա Գրոմովան ՀՀ ԱՆ իրավաբանական անձանց պետական ռեգիստրում հաշվառվել է 11.03.2022թ.-ին (հաշվառման համար՝ 264.1222897), կրկին հաշվառվել է 30.05.2022թ.:

Ա/Ձ Այլոնա Գրոմովան սահմանված ժամկետում չի ներկայացրել շրջանառության հարկ վճարող համարվելու վերաբերյալ հայտարարությունը, որի հետևանքով ավտոմատ կերպով համարվել է ավելացված արժեքի հարկ վճարող:

Համաձայն ՀՀ ԱՆ իրավաբանական անձանց պետական ռեգիստրի 06.07.2022թ. թիվ /25.6/29139-2022 գրության՝ 30.05.2022թ.-ին քաղաքացի Այլոնա Գրոմովան գործակալությունում կրկին հաշվառվելիս Հայաստանի Հանրապետության հարկային օրենսգրքով սահմանված և հարկային մարմնի կողմից հաստատված ձևով հայտարարություն՝ ավելացված արժեքի հարկ վճարող համարվելու և որպես ավելացված արժեքի հարկ վճարող հաշվառվելու, շրջանառության հարկ վճարող, ինչպես նաև միկրոձեռնարկատիրության սուբյեկտ համարվելու վերաբերյալ հայտարարություններ չի ներկայացրել, իսկ կրկին հաշվառման դիմումի մեջ ԱԱՀ վճարող համարվելու վերաբերյալ նշում է կատարել «ոչ» դաշտում:

3. Բողոքարկման առարկային վերաբերվող իրավական կարգավորումներ և եզրահանգումներ

ՀՀ հարկային օրենսգրքի 254-րդ հոդվածի 1-ին մասի 7-րդ կետին համապատասխան՝ հարկային տարվա ընթացքում պետական հաշվառումից դուրս եկած անհատ ձեռնարկատերը կամ պաշտոնից ազատված նոտարը տվյալ հարկային տարում կրկին որպես անհատ ձեռնարկատեր հաշվառվելու կամ կրկին որպես նոտար նշանակվելու օրվանից մինչև հարկային տարվա ավարտը (բացառությամբ Օրենսգրքի 59-րդ հոդվածով սահմանված՝ հարկային տարվա ընթացքում ԱԱՀ վճարող համարվելու դեպքի), եթե հարկ վճարողը մինչև կրկին որպես անհատ ձեռնարկատեր հաշվառվելու կամ կրկին որպես նոտար նշանակվելու օրվան հաջորդող 20-րդ օրը ներառյալ հարկային մարմին է ներկայացրել հարկային մարմնի հաստատած ձևով հայտարարություն՝ շրջանառության հարկ վճարող համարվելու վերաբերյալ, բացառությամբ այն դեպքերի, երբ անհատ ձեռնարկատերը տվյալ հարկային տարվա ընթացքում՝ մինչև պետական հաշվառումից դուրս գալը, կամ երբ նոտարը տվյալ հարկային տարվա ընթացքում՝ մինչև պաշտոնից ազատվելը, Օրենսգրքի 59-րդ հոդվածի համաձայն, համարվել են ԱԱՀ վճարող:

«Իրավաբանական անձանց պետական գրանցման, իրավաբանական անձանց առանձնացված ստորաբաժանումների, հիմնարկների և անհատ ձեռնարկատերերի պետական հաշվառման մասին» ՀՀ օրենքի 27-րդ հոդվածի 10-րդ կետի համաձայն՝ որպես անհատ ձեռնարկատեր (սույն օրենքի 25-րդ հոդվածի 2-րդ մասին համապատասխան՝ կրկին որպես անհատ ձեռնարկատեր) հաշվառված անձին գործակալությունը տրամադրում է (այդ թվում՝ սույն հոդվածի 8-րդ մասով սահմանված կարգով) նաև հարկային մարմնի սահմանած ձևով ծանուցում՝ Հայաստանի Հանրապետության հարկային օրենսգրքով սահմանված հարկային համակարգերի ու դրանց ընտրության նպատակով հայտարարություններ ներկայացնելու ժամկետների վերաբերյալ: Անհատ ձեռնարկատերերը Հայաստանի Հանրապետության հարկային օրենսգրքով սահմանված՝ ավելացված արժեքի հարկ վճարող համարվելու և որպես ավելացված արժեքի հարկ վճարող հաշվառվելու, շրջանառության հարկ վճարող, ինչպես նաև ընտանեկան ձեռնարկատիրության սուբյեկտ համարվելու վերաբերյալ հայտարարությունները կարող են ներկայացնել գործակալության միջոցով:

Ելնելով վերոնշյալ իրավակարգավորումներից, ուսումնասիրելով սույն գործի քննության համար էական նշանակություն ունեցող փաստերը և հաշվի առնելով ՀՀ ԱՆ իրավաբանական անձանց պետական ռեգիստրի 06.07.2022թ. թիվ /25.6/29139-2022 գրությունը Հանձնաժողովը գտնում է, որ անհրաժեշտ է հնարավորություն ընձեռել Ա/Ձ Ալյոնա Գրոմովային ներկայացնելու հայտարարություն՝ 2022թ.-ի ընթացքում շրջանառության հարկ վճարող համարվելու վերաբերյալ:

4. Եզրափակիչ մաս

Ելնելով քննության արդյունքներից և ղեկավարվելով Հայաստանի Հանրապետության հարկային օրենսգրքի 20-րդ բաժնով, «Մաքսային ծառայության մասին» Հայաստանի Հանրապետության օրենքի 37-րդ հոդվածով, Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը

ՈՐՈՇՈՒՄ Է՝

1. Շրջանառության հարկ վճարող համարվելու վերաբերյալ Ա/Ձ Ալյոնա Գրոմովայի դիմում-բողոքը բավարարել:

2. Ա/Ձ Ալյոնա Գրոմովայի կողմից շրջանառության հարկ վճարող համարվելու վերաբերյալ հայտարարություն ներկայացվելու դեպքում 2022թ.-ին համարել շրջանառության հարկ վճարող: Սույն որոշումն ուժի մեջ է մտնում իրազեկելուն հաջորդող օրվանից:



Recoverable Signature

X

ԱՐՏՅՈՒ ՍՄԲԱՏՅԱՆ

ՀԱՆՁՆԱԺՈՂՈՎԻ ՆԱԽԱԳԱՀ՝

Signed by: SMBATYAN ARTYOM 3210860416

ԱՐՏՅՈՒ ՍՄԲԱՏՅԱՆ